

Edizioni

- letto 537 volte

Huet

I.
Des or me vueill esjoïr
En chantant, en tel maniere
Que jamès ne quier issir
De riens qu'Amours me requiere,
Que si bel m'a fait choisir
Qu'a l'un ne puis mes faillir:
Ou beau vivre, ou beau morir,
En merci et en priiere.

II.
Et puis qu'il vient a plesir
A la debonaire fiere,
Qu'ele mon chant daingne oïr,
Toute autre rien met ariere;
Qu'ainsi me puist bien venir,
Com je plus l'aim et desir
Que ne savroie jehir:
Com plus i pens, plus l'ai chiere.

III.
Et s'aucune fois m'air
Pour fole gent nouveliere,
Tost me covient revenir
A ma matiere premiere,
Dont ne querroie partir;
Mes tant redout lor mentir,
Que sovent me font fremir
De lor maudire en derriere.

IV.
Quant sa grant beauté remir,
Qui est tant fiere et entiere,
Le beau cors, qu'a grant loisir
Fist Deus en joie pleniere,
Les biaux ieus qui pour traïr

Ne sevent clore n'ovrir,
Sachez que d'a li venir
Est ma volentez maniere.

V.
S'el me doigne retenir,
Dies, si tres joianz en iere!
Maiz ce m'a fet esbahir
Qu'ele n'est pas costumiere
De tel guerredon merir,
N'autres ne m'en puet guerir.
Por ce ne doi acueillir
Volenté fause et legiere.

VI.
Hon ne se puet mieus honir
Que de son bon repentir.
Si vueill mieus en ce fenir
Ne jamais partis n'en iere.

VII.
Chançons, di mon Bel Desir
Qu'a li, s'el me daigne oïr,
N'en doit on nule aatir
D'Espaigne trusqu'en Baviere.

VIII.
Beaulandois, li grief sospir,
Qu'a laron fais sens dormir,
Me font volentiers guenchir
Vilainne gent, mal parliere.

- letto 484 volte

Petersen Dyggve

I.
Des or me vueill esjoïr
en chantant, en tel maniere
que ja maiz ne quier issir
de rienz qu'Amours me requiere,
que si bel m'a fait choisir
qu'a l'un ne puis maiz faillir:
u bel vivre, u bel morir,
en merci et en proiere.

II.

Et puiz qu'il vient a plaisir
a la debonaire fiere
qu'ele mon chant deigne oïr,
toute autre rienz met arriere;
qu'einsi me puist biens venir,
com je plus l'aim et desir
que ne savroie jehir:
com pluz i pens, pluz l'ai chiere.

III.

Et s'aucune foiz m'aïr
pour fole gent nouveliere,
tost me couvient revenir
a ma pensee premiere,
dont ne querroie partir;
maiz tant redout lor mentir
que sovent me font fremir
de lor maudire en derriere.

IV.

Quant sa grant biauté remir,
qui si est fine et entiere,
le biau cors, qu'a son loisir
fist Diex en joie plenièr,
les biaux ieux qui pour trahir
ne sevent clorre n'ouvrir,
sachiez que d'a li venir
est ma volentez maniere.

V.

S'el me doigne retenir,
Diex, si tres joianz en iere!
maiz ce me fait esbahir
qu'ele n'est pas coustumiere
de tel guerredon merir,
n'autres ne m'en puet guerir.
Pour ce ne doi acueillir
volenté fausse et legiere.

VI.

L'en ne se puet mieuz honir
que de son bon repentir.
si vueill mieuz en ce fenir
ne ja mais partis n'en iere.

VII.

Chansons, di mon Bel Desir
qu'a li, s'el me deigne oïr,
n'en doit on nule aatir
d'Espaigne jusqu'en Baiviere.

VIII.

Gallandois, li douz souspir,
qu'a larron faiz sanz dormir,
me font volentiers guenchir
vilainne gent malparliere.

- letto 706 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-274prova>